




HEHEURAA API

ATOPA 1940

TE PARAU PAARI

Iritihia no roto mai i te Buka Fafau no te Ekalesia a Iesu Mesia
I te Feia Mo'a i te Mau Mahana Nei.

PENE 89

*E parau i heheuhia mai na roto i te hi'o ra ia Iosepha, i Ketelani,
i te mataeinaa ra i Geauga, i Ohio, i
te 27 no Febuare 1833.*

1. E Parau Paari no te maitai o te pūpū o te mau tahu'a
rahi tei amuihia i Ketelani, e no te ekalesia, e no te feia mo'a
i Ziona atoa hoi—

2. Ia tuuhia'tu ei aroha; eiaha râ ei faaueraa e ei tapearaa,
ei heheuraa ra e ei parau paari, i te faaiteraa'tu i te opuaraa e
te hinaaro o te Atua i te oraraa tahuti noa nei o te Feia mo'a
atoa i te mau mahana hopea—

3. I horoahia mai no te hoê tumu maitai, ei fafauraa, i faa-
auhia i te raveraa i tei paruparu e tei itoitoe ore i te feia mo'a
atoa ra, o te parauhia nei, e a ore râ, o te tia ia parauhia ei
feia mo'a.

4. Inaha, oia mau, te na ô mai nei te Fatu ia outou na e,
no te mau ino e te mau opuaraa e vai nei e e vai â i roto i te

mau aau o te mau taata imi parau ino i te mau mahana hopea, ua faaara vau ia outou, e te faaara faahou nei au ia outou na roto i te horoaraa'tu i teie parau paari na roto i te heheuraa ra.

5. Mai te mea e inu te hoê taata i rotupu ia outou na i te uaina, e a ore râ te hoê inuraa taero ra, inaha, e ere ia i te mea maitai, e ere hoi i te mea tia i te hi'oraa o to outou Metua, maori râ ia haaputuputu outou ia outou iho no te pupu atu i ta outou mau oro'a i mua ia'na ra.

6. E inaha, ia ravehia te uaina mâ, o te hotu o te vine no te reira, o to outou iho hamaniraa.

7. E teie â hoi, e ere te mau inuraa taero no te opu, no te horoiraa râ i to outou mau tino.

8. E teie â hoi, e ere te avaava no te tino, e ere hoi no te opu, e ere hoi te reira i te mea maitai no te taata nei, e raau rii râ te reira no te mau vahi pepe e te mau puaa ma'i, ia ravehia ma te paari e te aravihi.

9. E teie â hoi, e ere te mau inuraa ve'ave'a no te tino e te opu.

10. E teie â hoi, oia mau, te parau atu nei au ia outou na e, ua faataa te Atua i te mau raau rii maitai no te tino e te huru mau o te taata, ia ravehia e ana—

11. Te mau raau rii i roto i te tau mau ra, e te mau hotu atoa i te tau mau ra; ia ravehia teie mau mea atoa ma te paari e te mauruuru.

12. Oia ia, te i'o atoa o te mau puaa e te mau manu o te reva, ua faataahia ia e au, o te Fatu, ei maitai no te taata, na roto i te faaiteraa mauruuru; noa'tu râ, eiaha te reira ia amu faarahi-noa-hia;

13. E e mea au maitai ia ia'u e, ia ravehia te reira i te mau tau maa ore ra, te mau tau toetoe, e te mau tau o'e.

14. Ua faataahia te mau huru sitona atoa ei maa na te tata e na te mau puaa, ia riro ei maa tumu na'na, eiaha na'na ana'e, na te mau puaa o te aua e te mau manu o te reva, e te mau puaa oviri atoa o te horo e o te nee haere i nia i te fenua.

15. E ua hamani te Atua i te reira ia ravehia e te taata i te mau tau o'e e te mau tau poia rahi ana'e.

16. E mea maitai te mau huru sitona atoa ei maa na te taata nei; e oia atoa hoi te hotu o te vine; e te mau mea e faahotu mai i te maa i raro i te repo, e a ore râ, i nia a'e i te repo.

17. Atira noa'tu ra, te sitona na te taata, te tô papaa na te puaatoro e te paere na te puaahorofenua, e te rai na te mau manu pererau, e te mau puaa maohi e te mau puaa atoa o te aua; e te kerite na te mau puaa faufaa atoa, e no te mau inuraa avaava ore ra, e te tahi atu â mau huru sitona atoa ra.

18. E te feia mo'a atoa o te haamana'o i te haapao e i te rave i teie nei mau parau faaite, ma te haapao-maitai-noa-raa i te mau faaueraa, e farii ia ratou i te maitai i to ratou mau pito e te puo i to ratou ra mau ivi.

19. E e itea hoi ia ratou te paari e te mau tao'a rahi o te ite, oia hoi, te mau tao'a i hunahia ra;

20. E e horo ratou e e ore ratou e rohirohi, e haere ratou, e e ore roa ratou e fiu.

21. E o vau nei, o te Fatu, te faaau nei au i te hoê faufaa ia ratou, e e haere noa te melahi o te pōhe na nia ia ratou, mai i te mau tamarii a Iseraela, e e ore oia e taparahi ia ratou ra. Amene.

Te faatupu nei oia i te aihere na te mau puaa, e te raau rii na te taata.

Salamo 104:14.

E tâhitohito tei te uaina; e hauti rahi tei te ava taero; e ere i te taata paa-tei vare i tei reira.

Maseli 20:1.

Te faafatata noa ra hoi te tipi i to arapoa, ia amu hua oe e ia rahi.

Maseli 23:2

E pohe to ratou, to tei puai i te inu i te uaina ra, e tei etaeta ia anoi i te ava taero ra.

Isaia 5:22.

E rahi hoi oia i mua i te aro o te Fatu, e ore e inu i te uaina e te ava taero.

Luka 1:15.

EDITORIALE

EIAHA OE E MANA'O E, AITA TO TE ATUA E TINO

E tino iho â to te Atua, te Metua. Na mua i to tatou faariroraahia ei taata i nia i te fenua nei, e varua to tatou, e varua ana'e tatou. Ua haapao tatou i totatou vairaa matamua, no reira, ua horoahia ia tatou ia aha? Ia haere i muri anei? Ia maururu te Atua i te taata e tuu Oia ia'na haere i mua, e ua na reira hoi Oia ia tatou. No to tatou haapaoraa i ta te Metua mau faaue-raa i roto i te ao varua, ua horoahia mai ia tatou te ravea ia haere i mua, oia hoi, ua farii tatou i to tatou vai-tino-raa, ua apitihia mai to tatou varua i te tino. E taahiraa avae ia i mua. Mai te mea e e haapao maitai tatou i teie vairaa, e haare faahou a tatou i mua.

I roto i te Genese 1:26, te tai'o nei tatou i te parau a te mau Atua, o te anotau ia i hamanihia'i te ao nei: 'E hamani tatou i te taata ma to tatou iho huru, ia au i to tatou iho hoho'a; 27, Hamani ihora hoi te Atua i te taata ma to'na ihora huru, i hamani oia ia'na ma te hoho'a o te Atua ra; i hamani oia ia raua, o te tane e te vahine.' No reira, e mea papu e, ua hamanihia te tane e te vahine ia au i te huru e te hoho'a o te mau Atua, oia hoi, e tino tei humanibia no tatou, ua horoahia ia tatou te tia ia here, ia riri, ia maiti i ta tatou i hinaaro, no te mea, o te huru ia e te hoho'a ia o te Atua.

Ua parau Iesu e, 'Ahiri outou i ite na ia'u, ua ite atoa outou i tan Metua, e teie nei, ua ite outou ia'na, e ua hi'o hoi outou ia'na. Ua parau maita Philipa ia'na, e faaite mai ia matou i te Metua atirâ'tu ai. Ua parau atura Iesu ia'na, O to'u nei hoi parahiraa roa i ô outou nei e, e aore â oe i ite ia'u, e Philipa? o tei hi'o mai ia'u ra, ua hi'o ia i te Metua; eaha hoi oe i parau mai ai e, E faaite mai ia Matou i te Metua?' (Ioane 14:7-9)

Te ite nei tatou i roto i teie e, o te hoho'a mau Iesu no te Metua. E eaha te huru no Iesu? E tino to'na, e mea papu roa ia. Ua mana'o hoi te mau taata e, e taata iho â Oia mai ia ratou te huru. Aita roa ratou i mana'o e, e Atua teie. No to ratou mana'o ore i teie, eaha te mea ta ratou i rave? Ua faasatauro ratou Ia'na. E tino iho â ta ratou i faasatauro, eiaha te varua ana'e. E o tei ite i te Tamaiti, ua ite atoa ia i te Metua.

E au mau here, e tamarii ana'e tatou na te Atua. Aita tatou i tupu mai no roto mai i te hoê raau, e no roto i te hoê animala, mai ta Luka ra i parau i te faaiteraa mai i te hui tupuna o te taata nei, e tamarii tatou na Adamu, e tamaiti oia na te Atua. (A tai'o i te Luka 3:38)

No reira, e tamarii ana'e tatou na te Atua. I te matamua e varua ana'e to tatou i teie nei ua amnibia mai te tino. Araua'e, ia haapao maitai tatou, e hanahana te ninibia mai i nia ia tatou, e i te hopea, e tia ia tatou ia riro mai to tatou Metua te huru (e o te tia mau hoi ia, ia riro te tamarii mai te metua te huru), ei Atua.

Papaihia e R. Ioane Richards

'n
ot
an
ta

Nov
Nov
Nov
Nov

30.
oia h
mau
hopea
tau-

gl.
raa p
atoa

32.
man
o te h

fâ-ti
su M
reire
Mes
ni o
te m

TE PARAU AUTAHU'ARAA

No te Ava'e NOVEMA

TE MAU TAATA TUIROO O TE BIBILIA

E MAU UIRAA

1. O vai teie taata? 2. Eaha to'na toro'a? 3. Eaha te huru o to'na maitiraahia? 4. I hea ta'na ohipa i ravehia'i? 5. Eaha te ohipa i oti ia'na? 6. Ua mauruuru anei te mau taata ia'na? 7. Ua mauruuru anei te Atua ia'na? 8. E manuia anei tatou ia pee tatou ia'na? A tara mai.

Novema 3. NIKODEMO. Ioane 3: 7:50; 19:39.

Novema 10. KPRENEKIO. Te Ohipa 10.

Novema 17. LAZARO. Ioane 11a1-43; 12:1, 2, 9-11.

Novema 24. A haapii atu i te parau no na Haapii Hahaere no te ava'e i mua, mai tei papaihia i roto i te ve'a no te ava'e Novema.

Na Te Mau Maapii Mahaere na te Mau Utuafare

BUKA FAFAU Pene 112

30. I horoahia'tu hoi ia outou, oia hoi, i te Tino Ahuru ma Piti e ia ratou, oia hoi, i te Peresideniraa Matamua, o tei maiti-atoa-hia ei mau faaa'o e ei mau aratai no outou na, i te mana o teie nei Autahu'araa no te mau mahana hopea nei e no te taime hopea, tei reira hoi te tuuraa parau i te iraa o te mau tau.

31. Ua mau hoi outou i te reira mana mai ia ratou atoa o tei farii i te fuu-raa parau i te mau tau atoa, mai te haamataraa i te hamaniraa o te mau mea atoa aa.

32. Oia mau, te parau atu nei au ia outou na e, ue tae mai i raro nei te man taviri do te tuuraa ta outou i farii no o mai i te mau metua, e te hopea, o te haponohia mai nei, mai te ra'i mai, ia outou na.

Te ofai tumu o teie nei Evanelia, o teie ia, oia hoi, te fa-tino-raa mai o te Atua, te Metua, e Ta'na Tamaiti, o Iesu Mesia ia Iosepha Semeta, e i te matahiti i muri a'e i te reira, na faatia-faahou-hia te Evanelia, e te Ekalesia a Iesu Mesia na roto ia Iosepha. Tei ia ratou ra (te mau Peresideni o te Ekalesia) to, na mau mono mau e te tia, te heeraa o te mau taviri i faahitihia i roto i te irava i nia a'e, e tei ia

(A hi'o i te tuatiraa i te api 173)

INO

ia ei ta-
haapao
?Ia hae-
mua, eua
u faaue-
e i mua,
ou varua
tou i teie

tua, o te
to tatou
a i te ta-
ra; i ha-
ua hama-
oia hoi, e
ia riri, ia
o te Atua.

i tan Me-
parau mai-
parau a-
e aoe iite
ha hoi oe i
(9)

ia. E eaha
oi te mau
mana'o e,
tou i rave?
iaha te va-

i tupu mai
ka ra i pa-
ou na Ada-

varua ana'e
o maitai ta-
a ia tatou ia
o te tamarii

Richards

TE SOTAIETE VAHINE TAUTURU

No te Ava'e NOVEMA

Irava tamau aau: Alama 50: 20

E ao to oe e to ta oe mau tamarii; e e haamaitaihia ratou mai te au i ta ratou haapaoraa i ta'u mau faaue.

Mahana Maha (Matamua)

Mahana iritiraa mana'o e te himene na te mau tuahine.

Parau tumu no na Tuahine Hahaere: Te Ohipa no te Feia i Pohe. A tai'o i te I Korinetia 15:29, e a paraparau no ta tatou ohipa no te feia i pohe.

Mahana Maha (Piti)

To Moroni faaineine-faahou-raa no te tama'i. Alama 50: 1-7, 10-12.

Ua maitai te mau taata. Alama 50:17-25.

E peapea rahi i roto i te ati Nephi. Alama 50:25-36.

Mahana Maha (Toru)

Te poheraa o Nephiha, te Haava rahi i nia i te ati Nephi e te maitiraahia te hoê Haava rahi apî. Alama 50:37-40.

E peapea faahou i roto i te ati Nephi, i ropu i te taata tia-mâ e te taata hinaaro arii, e te peapea no Amalikia e to'ua mau taata. Alama pene 51.

Mahana Maha (Hopea)

Mahana raveraa ohipa na te mau tuahine.

E maheu te mau apoo tupapau e rave rahi, e e tuu ratou i to ratou feia i pohe ra; e rave rahi te feia mo'a te fa mai i te mau taata e rave rahi.

Helamana 14:25.

TE HAAPIIRAA SABATI

No te Ava'e NOVEMA

PUPU PARAIMERE

Irava tamau aau: *I Te Mau Arii 19:10*

Ua taparahi i te mau peropheta na oe i te 'o'e; e o vau nei, o vau ana'e nei tei toe: e te imi mai nei ratou ia'u nei ia pohe.

Nouema 3. Te pure a te peropheta tei faaora i te tamaiti. I Te Mau Arii 15:33 e tae noa'tu i te 17:24.

Novema 10. Te pure tei pahonohia na roto i te auahi. I Te Mau Arii 18:1-46.

Novema 17. Te reo ia Elia i nia i te mou'a. I Te Mau Arii 19:1-21.

Novema 24. Hi'opoaraa.

PUPU PITI

Irava tamau aau: *I Te Mau Arii 18:39*

E ite a'era te mau taata atoa ra i te reira, ua tipapa ihora i raro te mata; ua na ô a'era, O Iehova, oia te Atua: o Iehova, Oia te Atua.

Novema 3. Te pahonoraa i ta Elia pure. I Te Mau Arii 17; 18.

Novema 10. E mau parau a Iehova ia Elia. I Te Mau Arii 21.

Novema 17. Ua faaora o Elisaia i te raatira o ta Arama nuu. I Te Mau Arii 5:1-27.

Novema 24. Hi'opoaraa.

PUPU TORU e te MAHA

Irava tamau aau: *Exodo 20:3, 4*

Eiaha roa to oe ei Atua ê atu, ia'u nei. Eiaha roa oe e hamani i te idolo tarai no oe, e te hoho'a no te hoê mea i nia i te ra'i ra, e no te hoê mea i raro i te fenua nei, e no te hoê mea o te moana i raro a'e i te fenua ra.

Novema 3. O Pharao i te auauraa ia Iseraela e te horoaraa o te maa ia Iseraela. Exodo 14; 16.

Novema 10. To Iseraela taeraa i Sinai e te ture a Iehova i te tuuraahia mai. Exodo 19; 20.

Novema 17. Mose i nia i te mou'a—te kafa auro—na pãpã o te Ture i te hamani-faahou-raa hia. Exodo 24; 32:1-24; 34.

Novema 24. Hi'opoaraa.

TE FEIA API



No te Ava'e NOVEMA

Irava tamau aau: *Isaia 2:3*

E haere mai, e haere tatou i nia i te mou'a o Iehova, i te fare o te Atua o Iakoba; na'na e haapii mai i ta'na haapaoraa, e e haere tatou na te e'a ta'na e faaite maira. I na Ziona'tu hoi te ture i te revaraa'tu, e te parau a Iehova, i na Ierusalema'tu ia.

Novema 3. TE ARUI ROA E TE TAIVARAA. II Tesalonia 2:3, 4; Isaia 24:5; II Timoteo 4:1-4; Amosa 8:11,12.

Novema 10. TO IESU TAERAA MAI I TEIE NEI TAU. Ephesia 1:9, 10; Apokalupo 14:6,7; Isaia 2:2,3; Mataio 24:14, 30; Hiroa Faaroo N° 9.

Novema 17. E HOI MAI Â IESU. Te Ohipa 1:11; Iuda 14,15; Isaia 35:4; 40:10; Malaki 4:5, 6; Mataio 24:26:64; Mareko 13:26; I Tesalonia 5:2; Buka a Moromona: III Nephi 26:3, 4; 28:7, 8; 29:2;

Novema 24. TE HURU NO TE PURE TIA. Luka 11:1-4; Mataio 6:5-13.

TE HAAPIIRAA PARAIMERE

No te Ava'e NOVEMA

Irava tamau aau: *Genese 7:1*

Ua parau maira Iehova ia Noa, A haere oe e to fetii atoa i roto i te pahii; o oe hoi ta'u taata parau-tia i ite i mua i tau aro i teie nei ui.

MAHANA MAHA (MATAMUA)

NOA

Ua fatata e piti tauatini matahiti i muri mai i te tuuraahia o Adamu raua o Eva i roto i te O i Edene, i fanauhia'i te hoe taata, o Noa to'na i'oa. Itaua taimera e feia parau-tia oreana'e te rahiraa o te taata, aita to ratou e hoe mana, o maitai no te Atua. O Noa ana'e taata i nia i te fenua o tei hinaaro i te rave i te maitai,

Ua faaite te Fatu ia Noa e, "I te hopea o na matahiti hoê hanere e piti ahuru e faatupu vani i te hoe diluvi rahi roa i nia iho i te fenua, e e pohe te taata atoa, e te mau animala atoa; no te mea ra e, e taata maitai oe, te hinaaro nei au ia hamani oe

i te hoê pahi rahi, ia tia ia faaorahia te hoê tufaa o te mau animala atoa i nia iho i te fenua nei." E ua faaite mai te Fatu i te huru o te pahi e hamanihia.

I te iteraa o te mau taata ia Noa i te hamaniraa i te hoê pahi rahi i te vahi aita roa e miti, ua mana'o ihora ratou e, ua maamaa roa oia, e aita roa ratou i faaroo mai ia'na a faaite atu ai oia e, e mou te taata atoa i nia i te fenua. Ua ata puai noa râ ratou.

Ia hope hoê hanere e piti ahuru matahiti, ia oti te pahi rahi i te hamanihia e Noa, ua faaite maira te Atua ia'na ia haere i roto, mai te rave atoa i to'na hoa, e ta'na na tamaiti tootoru e to ratou ra hoa. E ua faaue ihora te Atua ia arataihia e piti o te mau huru animala atoa o te ore e au ia amuihia e te taata, e hoê ahuru ma maha o te mau huru animala e au ia amuhia, i roto i teie pahi rahi no Noa ra. No reira, ua aratai maira Noa i te mau animala, e te mau manu o te reva, e ua haaputuputu i te maa e navai no te hoê matahiti. I reira, ua haere ratou atoa i roto i te pahi, opani ihora i te opani ia ore te miti ia o i roto, no te mea, ua parau na te Atua e, e ati te fenua i te diluvi rahi ia'na.

MAHANA MAHA (PITI)

TE DILUVI

Ua ite te Fatu e, tei roto te mau taata parau-tia, oia hoi o Noa e tona utuafare, i te pahi, e te tahi pae no te mau manu o te reva e te mau animala o te fenua, e ua faatopa oia i te ua. Aita â tatou i ite i te ua i te toparaa mai te reira te puai e te rahi. Ua i te mau anavai, e te mau peho, e tae noa'tu ua haamata te pahi tei faaea noa i nia iho i fenua maro, i te painu. Ua horo te mau taata atoa i te tupuai o te mou'a, aita ae'ra râ i maoro, ua tae te diluvi i reira, e pohe atura ratou. E te mau manu atoa, aita to ratou e vahi faaeearaa, no reira, ua pohe atoa ihora ratou. Te mau mea atoa tei haere e tei nee haere i nia i te fenua, o tei mau atoa i roto i te reva, ua pohe ratou atoa no te riri o te Fatu i te mau taata atoa, maori râ, o Noa e to'na utuafare.

Ua hope a'era e maha ahuru mahana e e maha ahuru pô i te ua-noa-raa, e ua faaea ihora. No te mea ra e pape to nia iho i te fenua taatoa nei, ua tono mai te Fatu i te hoê mata'i rahi no te faatahe-ê-atu i te pape, e ua oti te reira i te hopea o na ava'e e hoê ahuru ra. I reira te faaeearaa o te pahi i nia iho i te fenua, eiaha i nia i te moana rahi. Ua tono atura oia

i te hoê manu i rapae i te pahi, aita râ i itea ia'na te vahi no te faaeearaa, e ua ho'i mai oia. Ite ihora ratou e, aita â i tia ia ratou ia haere i rapae. Ua tia i rii â ratou, e i reira tono faahou atura ratou i te tahi manu i rapae, e i to'na ho'iraa mai, e rau matie to roto i to'na vaha. Ua ite ihora Noa e, te tupu faahou ra te mau raau, e ua nenenehe ia ratou ia haere i rapae i te pahi i teie nei. Ua tia ra ratou no te hoê hebedoma, e tono faahou atura i te tahi manu o tei ore roa i ho'i mai. No reira, ua iriti noa i te uputa o te pahi, e ua haere ratou e te mau mea ora atoa i rapae i te pahi e i nia i te fernu maro. Ua pûpû atura ratou i te tusia i te Fatu e ua haamori Ia'na no to'na faaoraraa ia ratou.

MAHANA MAHA (TORU)

Te Anuanua

Ua ite anei oe i te tau i haamata'i te anuanua i te itehia i roto i te ra'i i muri iho i te toparaa o te ua? E ite tatou mai te mea e tai'o tatou i roto i te Geuese 9:13,14.

Ua ore te diluvi, ua oti i te Fatu i te haamon i te mau taata paran tia-ore atoa o te fenua nei, e feia parau-tia ana'e o Noa e to'na utuafare, tei toe, no reira ua pûpû ratou i te tusia i te Fatu. Ua mauruuru roa Oia i teie, e ua fafau mai Oia ia ratou e, eita roa Oia e haamon faahou i te ao nei i te diluvi, e i reira Oia i tuu ai te anuanua i roto i te ra'i, ei tapao i te mau taata e, te haamana'o noa nei Oia i ta'na fafau ia Noa.

I teie nei, te faaitehia nei ia tatou e, e auraa rahi roa to teie tapao. Ia tae i te hoê matahiti eita e ite-faahou-hia te anuanua, e ite tatou e, o te matahiti ia a tae faahou-mai ai Iesu i te fenua nei.

No reira, mai teie atu â, ia ite oe i te anuanua, a horo i rapae e hi'o maitai i te reira, a haamana'o ai i te auraa rahi o te reira.

MAHANA MAHA (HOPEA)

TE FEIA TEI HAMANI I TE PARE TEITEI

I muri mai i te diluvi rahi, ua rahi faahou te taata i nia i te ao nei, e ua hinaaro te Fatu ia parare faahou ratou i te tahi mau fenua, eiaha ratou paatoa ia faaea i te vahi hoê. E ua na reira ratou i te matamua, ua hinaaro râ te tahi pae ia tahoêhia ratou i roto i te hoê oire rahi, no reira ua haapii ra-

tou i te ravea no te hamaniraa i te ofai araea, e i reira, ua haamata ratou i te patu i te oire i parauhia o Babela, e a ore râ, o Babulonia. I te vahi i ropu mau no teie oire ua mana'o ratou e, e patu ratou i te hoê pare e tae atu ai i te ra'i. Te mana'o nei te tahi pae e, no te taeraa'tu i te ra'i, e te tahi pae, ia ore ratou ia roo-faahou-hia i te diluvi.

Ua riri te Atua i te reira, e ua haere mai oia i raro, e ua faahuru ê i te mau reo o te mau taata. I reira aita i taa ia ratou ta te tahi i ta te tahi parau, e aita'tura i tia ia ratou ia patu i te pare e te oire rahi. No reira ua haaputuputu noa ratou i roto i te mau pŭpŭ tei taa ta ratou parau, te tahi i te tahi. Ua na reira te Atua ia purara ê ratou i te tahi mau fenua, mai Ta'na i hinaaro i te matamua ra.

E te reira ia te tumu no te vairaa, i teie nei, o te mau reo e rave rahi, mai te reo Farani, e te reo Tahiti, e te reo Paretane e te reo Paniora. No reira, ia faaroo faahou oe i te hoê reo êê, a haamana'o i te vahi i haamatahia'i te faa-huru-ê-raa o te mau reo.


NA TE MAU HAAPII HAHAEERE NA TE MAU UTUAFARE

(E tuatiraa no ie api 167)

ratou, o tei faataahia, te mana no te aratairaa i te Nunaa o te Atua i te ao atoa nei.

I te mau taime, mai teie nei tau te huru, e faatae mai taua ite ra i te tamahanahana rahi i te mau melo o te ekalesia. I te mau matahiti i muri noa ibo i te faaho'iraa mai, e tae roa mai i teie nei tau, aita roa'tu te Feia Mo'a o teie ekalesia i aratai-ê-hia'tu.

I te mau taime atoa, ia pee tatou i te mau faaa'oraa o to tatou mau taata aratai, ua faatiahia to tatou faaroo ia ratou. I teie nei, a titauhia'i, mai tei ore â i titauhia, te paari e te aratai mo'a, te ravea tia ia haapaohia e te Feia Mo'a, o teie ia, ia vai to tatou faaroo i roto i te mau tavini o te Atua.



Ua Faaorehia Ta Oe Hara

Na Terē W. Braegger

I TE hoê oire ra o Galilea te vai ra te hoê vahine. I to'na apîraa ua haapao oia i te mau faaueraa a te Atua, e te mau ture o te fenua atoa, e no to'na haapao-maitai-raa ua faaturahia oia e te mau taata atoa tei ite ia'na.

Ia paari ra oia ua tupu te hoê peapea rahi, e no te reira oia i faarue ai i ta'na ohipa maitai, e ua riro oia ei vahine i vahavahahia e te mau taata atoa.

I taua taime ra ua tae te hoê taata i taua oire ra o Galilea o Iesu to'na i'oa, o te Taata ia tei parauhia e te mau peropheta tahito. Te haapii ra Oia i te Evanelia o te Basileia o te Atua.

Ua maere roa te mau taata i te mau semeio e rave rahi tei ravehia e Ana, e ua hinaaro ratou ia farerei Ia'na, peneia'e e rave Oia i te hoê semeio i rotopu ia ratou.

I To'na a'oraa i taua na mahana ra, ua parau mai Oia e, *E haere mai outou ia'u nei, e te feia i ha'a rahi, e te teiaha i te hopoia, e na'u outou e faaora.*

No taua mau parau ra i tupu ai te feruriraa i roto i taua vahine hara ra, e te hinaaro hoi ia mâ oia i ta'na mau hara.

A parahi ai Iesu i Galilea ua anihia oia ia haere i te fare o Simona te Pharisea ia tamaa. I taua taime ra te vai râ te hoê peu i rotopu i taua feia ra, oia hoi, ia tae te hoê taata i te hoê fare, na te fatu no taua fare ra e farerei ia'na ma te ho'i, e na'na hoi e afai mai i te pape no te horoiraa i to'na avae, o na'na hoi e faatahinu i to'na upoo i te monoi.

A tamaa'i Iesu i reira, ua tae mai taua vahine hara ra, ti-papa ihora i mua ia Iesu ma te oto, e rarirari a'era To'na avae i te roimata, horoi ihora i to'na rouru, e faatavai ihora i te mura. A rave ai oia i taua ohipa ra ua ohumu te mau taata i roto i taua fare ra, no te mea, na ite ratou e, e vahine hara oia. Ua ite Iesu i te mana'o o taua mau taata ra, e ua parau atura Oia ia Simona e i to'na mau hoa, na ô atura, *I tomo mai nei au i roto i to fare nei, aore oe i hopoi mai i te pape ei horoi i ta'u avae, e ua faararirari ra oia i ta'u avae i te roimata, e ua horoi i ta'na iho rouru, aore oe i ho'i mai ia'u, area, teie nei vahine, aita a'enei i faaea i te ho'iho'i i tau avae mai to'na tomoraa mai â. Aore oe i faatahinu mai i ta'u upoo i te monoi, area oia, ua faatavai ia i tau avae i te mura. E teie nei, te faaita atu nei au ia oe, o ta'na nei hara rahi, ua faaorehia ia.*

Ua parau a'era oia i taua vahine ra, *Ua faaorehia ta oe hara, ua ora oe i to oe faaroo, ia ora na i te haerea.*

No te aroha rahi, no te aau haehaa e te faaroo rahi i te Atua i roaa'i i taua vahine ra te mau mea ta'na i hinaaro, oia hoi, te faaoreraa i ta'na mau hara.

Na roto i te pure e tia ia tatou ia haere i mua t te Atua no te faaiteraa'tu Ia'na i ta tatou mau hara, e mai te mea e na reira tatou mai te aau haehaa, mai te mana'o papu e mai te faaroo i te Mesia, na'na ta tatou mau haru e faaore.

Te Pane Ora

Tei papaihia e Nile R. Chugg.

NO te hoê tau huru maoro ua itoitoe roa te mau aporetolo i te haapaoraa i ta ratou ohipa i Galilea, i reira ho'i maira ratou e faaite maira ia Iesu i te mau mea atoa ta ratou i rave. Ua rave atura Iesu ia ratou e aratai atura i te hoê vahi i taata-ore-hia o te oire ra o Bete-saida. Ua haere ratou i reira no te faaea-rii-raa, *aita hoi o ratou maa taima i pau ai te maa i te rahi o te taata i te haerea mai e te haereraa'tu.* Mareko 6:31.

Ua hoi atura ratou na nia i te hoê pahi. Ua horo ra te mau taata na uta, mai roto atu i te mau oire, e i to Iesu ratou e ta'na mau pipi tipaeraa, te tia ra te feia rahi. E rave rahi te mau mea ta Iesu i haupii atu ia ratou. E ia fatata te mahana i te pau, ua ani mai te mau pipi Ia'na ia tuu atu i taua feia ia. Aita râ hoi i tia Ia'na ia na reira, no te mea ua ite Oia e, ua poia roa ratou. O te tupuraa ia o te semeio i parau-noa-hia, te faaamuraa i te pae tauatini.

I te reira taima ua farii iho â te mau taata ia'na ei arii no ratou. Ua rave rahi tei faaroo e, o oia te Mesia, e te mana'o o ratou e, e faatia oia i te hoê Basileia, e e au maitai ia ratou ia amui atu ia'na. E amui ratou i te hoê taata te tia ia'na ia horoa i te faraoa na ratou ia poia ratou. Ua ite râ Iesu i to ratou aau e to ratou huru, e i muri rii a'era parau atura oia ia ratou: *Amene, amene, e parau atu vau ia outou,*

e ere râ to te mea ua ite outou i te mau tapao ra, te imi nei râ outou ia'u, no te mea i amu outou i te maa ra e paia a'era. Eiaha e ohipa i te maa tahuti noa, i te maa râ e tia i te vai-raa e tae noa'tu i te ora mure ore ra, o ta te Tamaiti a te ta-ata e horoa mai na outou na: oia hoi tei haapaohia e te Atua e tana Metua ra. Ioane 6:26, 27.

Te taa noa râ ia Iesu e, aita ratou i hinaaro i te faairi Ia'na ei Arii i te mea ua rahi a'e to ratou here Ia'na e i Ta'na ohipa, i to ratou here i to ratou iho ora, e opuaraa maa-maa ra ta ratou. Ua pee noa ratou na muri Ia'na no te mea e faaamu oia ia ratou i te maa. No reira, ta te Mesia parau-raa'tu ia ratou, *Teie ta te Atua ohipa hinaaro, ia faaroo outou ia'na i ta'na i tono mai* (Ioane 6:29), e ua ani maira ratou i te hoê tapao e tia'i ia ratou ia faaroo, i te na ôraa mai e, *I amu na to matou hui tupuna i te mana i te medebara ra, o tei papaihia ra e, I horoa mai na oia i te pane o te ra'i na ratou.* (Ioane 6:31) Pahono atura te Mesia ia ratou, na ô a-tura' *Aore Mose i horoa mai i te pane o te ra'i na outou, ua horoa mai râ tau Metua i te pane mau o te ra'i no outou. Te-ra ta te Atua pane, o tei pou mai mai te ra'i ra, e o te horoa i te ora no te ao ra.* (Ioane 6:32, 33)

Aita râ to ratou mana'o i huru ê. Te feruri noa ra ratou i te pane no te pae tino nei ei haamauruururaa i to ratou mau hinaaro au ore, i pahono mai ai ratou Ia'na e, *E te Fatu, eiaha oe e faaea i te horoa mai i taua pane ra na matou.* (Ioane 6:34) Faaite atura Iesu ia ratou i te pane ta'na e parau-ra: *O vau te pane ora; o te haere mai ia'u nei, e ore roa ia e poia, e te faaroo mai ia'u nei, e ore roa ia e poiha. Ua parau atu na ra vau ia outou, ua ite outou ia'u, e uita outou i faaroo. O vau te pane ora o tei pou mai mai te ra'i; o te amu i teie nei pane e tia ia i te oraraa; o ta'u pane e horoa'tu o to'u ia tino, o ta'u ia e horoa ei ora no to te ao.* (Ioane 6:35, 36, 50, 51)

Te tamata noa ra Iesu i te haapii i Ta'na mau pipi e, o Oia te Pane ora mau, e ia imi ratou i te mau mea no te pae varua, oia hoi, te maa varua Ta'na e tamata ra i te faaamu ia ratou e tia'i.

Ua haapapu Oia ia ratou ra mai te parau e, *No te varua te ora, aita o te tino faufaa; te parau ta'u i parau atu ia outou nei, e varua ia, e ora tei reira. E i reira, e rave rahi ta'na mau pipi tei faarue Ia'na, e aita maira i pee faahou Ia'na.* (Ioane 6:66)

No reira, te ite nei tatou e, ta Iesu ohipa o te horoa ia i te taata i te Pane no te ora mure ore. Tera râ, aita ta te tahi pae pîpî e ravea e tia'i ia ratou ia ite i te Pane Varua, e ua vî ihora raton i te hinaaro ia faaore i te poia no te pae tino nei. A ta ratou i ite e, e piti tino e vai nei te tia ia faaamuhia, te tino varua e te te tino tahuti atoa nei. E i parau na te Mesia, o te tino varua te tino e tia ia tatou ia haapao.

Ua riro te pae rahi o to te ao nei, i teie nei mahana, mai ta Iesu mau pîpî, i te imi-noa-raa i te mauruuru no te mau hinaaro no te pae tino, e i te faarueraa'tu i te Pane ora.

Hoê Hoi Atua

Na Etera T. Benson

E faaroo mai, e au mau taata, i ta'u ra ture; e fariu mai to outou tari'a i te parau a tau vaha. Ua tuu mai oia i te parau na Iakobo e ua haapao i te ture na Iseraela; ta'na i faaue mai i to tatou mau tupuna ra, ia faaite atu ratou i ta ratou ra mau tamarii. (Salamo 78:1,5)

E hoa maohi e, e huaai oe no Aberahama e no Iseraela. Ua haamori Iseraela ia Iehova, tei teitei roa i to te fenua atoa nei. Na'na i horoa mai i te faufaa haapao tamau-hia ra, oia hoi te Evanelia

O vai ia to oe Atua? Te haamori nei anei oe i te Atua o Iseraela ra, e a ore ra te haamori nei anei oe i te tahi idolo? AITA ROA te Atua i hinaaro nei i to'na ra mau tamarii ia haamori i te tahi Atua ee. Te na o maira Paulo e Hoe hoi Atua, hoe faaroo, hoe baptizo. Eaha ta oe baptizo? Hoê a huru anei ta oe baptizo e ta Iesu? Oia hoi, te baptizo utuhi? Hoe a huru anei ta oe faaroo e te faaroo ta Iesu i faatia i nia i te ao nei i mutaa ihora? Mai te mea e, aita oe e haapao nei i te baptizo utuhi a te hoe taata e mana to'na, e mea papu ia, te haamori nei oe i te tahi Atua ee. No te mea

ore roa te Atua i faatia i te baptizo pipi e te baptizo ninii (Aroe roa e taata e rave noa i teie nei tura na'na iho, maori ra o tei parauhia e te Atua, mai Aarona ra. Hebera 5;4)

No reira, eaha te ohipa toe na oe, maori ra ia ninii oe i te Atua mau? Te reira hoi te ora mure ore. No reira, a haere ia, a imi noa, e e itea ia ia oe. a patoto atu, e iritihia mai te opani ia oe, a ani e horoahia mai ta oe.

Eiaha roa'tu oe e parau e, "Aita e peapea, te vai ra te mahana e ite ai au i te faaroo mau, e ei reira vau e tatarahaph e fariu i to'u Atua." Aita anei oe i ite e, e mana a to taua varua ra, tei roto i to oe tino, i te mahana e pohe ai oe, i nia i to oe tino i taua ao mure ore ra!

A ara na? e faafariu mai i to tari'a e to oe aau, e a faaroo i re reo o to oe Atua. Eiaha oe e faaroo noa e pee noa i muri i te mau orometua haavare. A faaroo, e a haapao, ei reira oe e riro ai e tamarii na te Atua, e e roaa ia oeto oe ai'a i te basileia a te Atua.

PARAU API NO TE MISIONI

PARAU FAAITE

Te hoohia nei, i te Fare Orometua, i Papeete, te mau Buka i raro nei:

Buka Monoraa.....	2 farane
Te Mau Api no te Raau Ora.....	3 "
Te Faahororaa Bibilia.....	5 "

TE MAU PARAU API REPUPIRITA FARANI

Aitiamaraa - Aifaitoraa - Autaeaeraa

HAAPAORAA FARANI NO OTEANIA

Parau Faaiteraa i te Huiraatira

Ei pahonoraa i te hinaaro mau o te mau taata atoa o teie nei fenua aihuaraau, ua fafau te Tavana Rahi, i te 25 no Tiunu 1940, te amui hoeraa o te mau Fenua Farani no Oteania, i te mau Hau Amui, no te tamau-noaraa i te aroraa i te mau enemi.

Taua fafau ra, ua faaitetia ia i te huiraatira na roto i te hoê parau tei neihihi i roto i te parau radio no te 25 no Tiunu, e aita roa'tura te reira mau parau i apee-nca-hia'tu i te mau ohipa e au.

Area râ:

1.-Te farii noa râ te Faatereraa Hau o te fenua nei i te mau faaueraa no o mai i te Faatereraa Hau i Vichy ra, tei haere noa'tu te papuraa e, e tumu purutia to taua mau faaueraa ra. I teie nau hebedoma hopea nei, ua ite papu-roa-hia te auraruraa o teie Faatereraa Hau no Vichy na roto i te mau niuniu tei tae mai i ô nei, mai teie te huru: (*maori râ ia faatiatia e te Hau Purutia*) e ua riro te reira ei patoiraa i te mau ohipa a te Hau Amui, oia hoi, "te haruraa i te mau pahi o te mau hau amui, e a ore râ, te faaiteraa e, e haere ratou i hea, te opaniraa i te mau taata tumu no taua mau hau amui ra, tei tapeahia e Purutia, ia haere i rapae i teie nei mau fenua, etc."

2.-Ua haamata to tatou Faatereraa Hau fenua i te faatere i te mau ture no Vichy mai, ma te tuu mai i te mau parau haavî vitiviti ia ore ia haapaohia.

3.-Ua faatia te Faatereraa Hau o teie nei fenua ia faatupuhia te hoê Tomite tei au ta ratou mau parau tumu i te mau parau tei faatupu i te faatitiraa o te mau fenua tiamâ.

4.-Ua noaa-riirii-mai te man parau tumu no te Parau Faahauraa Tama'i, oia hoi, te Armistice, e na roto i te reira ua noaa mai te papuraa e: a) Ua tuu te reira faahauraa tama'i i roto i te rima o to tatou mau enemi, ta tatou mau mauhaa tama'i, ta tatou mau pahi, e ta tatou auro, e e rave ratou i te reira no te aro atu i te mau Hau Amui; b) Ua hape roa te tiaturiraa a te Marechal Petain i to'na mana'oraa e, e taaotihia te tama'i na roto i te hanahana; c) I teie nei, te noaa mai nei te papuraa e, te haere noa nei te Faatereraa Hau no Vichy i raro a'e i te faatereraa tîfî a te enemi o tei iriti atu, no roto i to ratou rima, i te tia ia mono i te huiraatira Farani Tiamâ

I mua i te reira mau tupuraa, tupu atura te hoê Tomite no te faatiraa te hoê Farani Tiamâ i te 24 no Atete 1940, e aita i maoro paturuhia'turai oia e te mau feia mana, te mau Apooraa o te fenua e te mau mono mau no te huiraatira.

I te 31 no Atete, a patoi noa'i te Tavana Rahi i te faaite papu i te amuiraa o teie nei mau fenua i te Faatereraa Hau Farani Tiamâ, ua faatia oia, i raro a'e i te puai o te hinaaro o te huiraatira, ia faatupuhia te hoê maitiraa.

I te 2 no Setepa, mahana haamana'oraa no te haamataraa o te tama'iraa ia Purutia, ua faataehia'tu te parau faaite no te hopea e taua maitiraa ra i te Tavana Rahi.

Ua faaite te huiraatira tastoaa o Tahiti i to'na amuiraa i te parau a te Tomite no "Farani Tiamâ". Na roto i te mau reo ra e 5,564 ei patoi i na reo 18 ra, ua faaite te huiraatira i to'na hinaaro ia faatia i te Tomite a te Tene-rara De Gaulle ei Faatereraa Hau no Farani Tiamâ, e ia tamau â i te tama'i i te pae o te mau Hau Amui.

Na roto i to'na oreraa e hinaaro i te tuu i to'na i'oa iraro a'e i te hinaaro o te huiraatira, ua faaho'i oia i to'na toroa.

Ua ani atura te Tomite i te mau taata ra, o M. M. Ahnne, Lagarde, Martin, e mau melo no te apooraa a te Tavana, e ia M. Bambridge, te Tavana Oire e te peresideni no te apooraa o te mau haamau'araa, ia mono i te Upoo o te fenua tei vaiiho i ta'na ohipa. Ua farii ratou i taua ohipa ra, oia hoi, ia faatupu i te hoê faatereraa Hau no teie mau mahana nei.

Teie te huru o te mau opuaraa i opuahia e ratou ra:

1. Te faarii-papu-raa i te Faatereraa Hau a te Tenerara De Gaulle o te maiti mai i te hoê Tavana tumu, e i te reira taata e horoa'tu ia te Faatereraa Hau mono i te mau mana atoa.

2. Te faaoreraa ia i te mau ture a te Hau no Vichy tei neneihia i roto i te Ve'a a te Hau, e te faaore-roa-raa i te fariiraa i te mau parau no ô mai i te faatereraa Hau no Farani tei parahihia e te enemi. Te faatia-faahou-raa o te Hau Repupirita Farani.

3. Te faatupuraa i te mau hi'opoaraa i roto i te feua nei, mai te au i te hi'opoaraa maitai i te mau taata Purutia i teie nei mau fenua, e te mau feia faatupu peapea, e te mau taata atoa te tia ia faatupu i te mau opuaraa iino ra. Mai te mea eita e patoihia teie nei Faatereraa Hau Api, eita roa e haa-peapeahia to te taata nei tiamâraa, e e imihia te mau ravea atoa ia faaho'i atu, i to ratou fenua tumu, te maa taata tei hinaaro i te reira.

4. Te faahuru-ê-raa o te faatereraa o te politita rapae o te fênua na roto i te rave-faahou-raa i te mau parapauraa e te Hau Baratane e te iriti-faahou-raa o te piha toroa o te Tonitara Baratane.

5. Te imiraa te ravea ia maitai faahou te ohipa hooraa tao'a o te fenua nei na roto i te amui-faahou-raa i te ohipa hoo tao'a e te fenua Niu-Zelani e Australia, e na roto i te faaapîraa i te faatereraa o te mau faatereraa politita e te hooraa tao'a.

Te hinaaro nei te Faatereraa Hau Mono ia faaite papu e, aita roa oia e titau nei i te hoê ohipa politita, e a ore râ, no te pae o te faaroo. Teie ana'e ta'na titauroa, oia hoi, te amuiraa o teie nei fenua i te Tomite o Farani Tiamâ a te Tenerara De Gaulle e te tamauroa i te aroraa i te enemi tumu, e i teie nei ua oti ia ohipa.

Te faaite nei te Faatereraa Hau Mono i to'na mauruuru i te huiraatira no to ratou tura e te hape ore, e te haamauruuru atoa nei ratou i te mau faa'oi ia tura no te faatupuraa i te hau tei rave i ta ratou ohipa ma te afaro maitai. Te tiaturi nei oia i nia i te taatoa, ia vai hau noa te fenua e ia ore roa te peapea ia tupu.

Te tere noa nei te oraraa o te taatoa,
Te tere noa nei te piha raveraa ohipa a te Hau,
Te vai noa nei â o Farani.
IA ORA O FARANI TIAMÂ.

Te Faatereraa Hau Mono o Oteania Farani

E, AHNNE, G. LAGARDE, E. MARTIN, G. BAMBRIDGE.

Marcel Bonnet, Gérant

L. Yale Peterson, Éditeur de la Mission

Eugène M. Cannon, Imprimeur

Neneihia e te MISIONI TAHITI no te Ekalesia a Iesu Mesia i te Feia Mo'a i te Mau Mahana Hopea Nei. Orovini, Papeete, Tahiti.

Te hoo: e 5 farane i te matakiti; e 10 farane no na matakiti e toru.



H

ra o L
A tuu
tamait
haere

"Oï

"E

"E,

"Ua
reira?"

"Oï

"Ua

maere

"E,

"E

"E

"E

mau v.

Hi'o

Tei ô

tia ra.